

Sier Trojan Bon qu. sier Otavian, oltra ducati 600 prestò loro fradeli ultimamente, hora impresta . . . ducati	400
Sier Vincenzo Zen qu. sier Piero, oltra esser andato con la sua persona e fanti e pagà le so' angarie . . . »	300
Sier Trojan Bon vene a zonzer a l'imprestado . . . »	100
Sier Zacaria di Prioli qu. sier Lunardo, è a Padoa, sier Zuan Alvise Venier so cugnato andò a prometer, . . . »	500
oltra fazion fate su le fabriche di Padoa.	
Sier Bortolamio Morexini qu. sier Lorenzo, oltra danni e incendi . . . »	200
Sier Hironimo Barbaro, qu. sier Bernardo . . . »	200
Summa ducati	2200

A di 22 la matina. *Fo letere di Franza da li oratori nostri, zoè di Milan, di 19.* Come, a di 18 la matina, partino li do oratori per qui, et era tornà di campo monsignor di Talagni stato soto Brexa, et referito al Re quello bisognava. *Unde* il Re à consiliato mandar 3000 fanti over lanzinech, et daria Piero Navaro, ma è amalato; vol far etc. à mandà l'artelaria e monition etc. *Item*, è zonti li da Sua Majestà 4 oratori di sguizari per tratar acordo. *Item*, hanno visitato domino Piero Navaro, qual havia infasata la testa. Si duol non poter venir soto Brexa, ma presto sarà varito; *tamen* la sua malattia sarà longa; e altre particolarità.

Di campo, di provedadori zenerali, di 20, date soto Brexa. Come, zonte siano l'artelarie, li planterano a la terra et principierano la bataria. Hanno mandato a far zente paesane, et el signor Zuan Giacomo si havea risentito alquanto. *Item*, di la compagnia dil qu. capitano zeneral. *Item*, dil mandar quel araldo in Brexa, monsignor di Talagni non li parse, senza licentia dil Cristianissimo re. *Item*, di altre particolarità. Et si mandi danari per pagar le zente: a di 24 è il tempo.

Di missier Zuan Jacomo Triulzi a la Signoria nostra, di 20, date in campo soto Brexa. Che spera omnino aver la terra, o per amor o per forza, e promete etiam aver Verona; con altre parole.

Di Padoa, di oratori tutti 4. Dil zonzer a hore 23 in Porzia, ricevuti da quelli rectori e cittadini e accompagnati al vescoado. Non hanno fino 21

cavalli, sichè non sanno come far, et aspeterano il resto e li salvi conduti etc. Et altre occorrentie.

Di Ingiltera, di sier Andrea Badoer et sier Sebastian Zustignan cavalieri oratori nostri, date a Londra 25 Septembre. Il Zustignan è varito, il Badoer non partite per non aver danari di levarsi. Il Re non era in la terra.

Di Rodi, di Piero Brexan secretario nostro mandato a quel Gran Maistro per . . .

Da poi disnar, fo Consejo di X con la zonta. Et feno 4 di zonta fino tornino li 4 oratori vanno al Cristianissimo re: i qual tutti 4 è di la zonta. Et rimaseno sier Anzolo Trivixan fo capitano a Padoa, sier Batista Moresini fo podestà a Padoa, sier Polo Capelo el cavalier fo savio dil Consejo, et sier Alvise Grimani fo consier.

A di 23. La matina non fo letere, *solum* fono fati cavalieri do erano con il qu. capitano zeneral, *videlicet* Galeazo Rapeta vicentino, era capo di cavali zieri dil dito capitano, et Cosma di Tonsi cremonese, qual era . . . quali sier Francesco Foscari el cavalier li tene e calzò i spironi. Et erano vestiti di negro per il capitano zeneral morto; le trombe erano preparate per acompagnarli non volseno, e li pagono etc.

Di campo, al tardi, vene letere di provedadori zenerali, di 21, hore . . . Zercha danari si mandi, *aliter* le zente si partirano et maxime le fantarie. Il signor Zuan Jacomo è risentito di fluxo, pur stava meglio; il Bastardo di Savoja e le zente è zonte in campo, et 5 pezi di artelleria che loro francesi aveano, zoè canoni, per bater la rocha di Cremona. Aspetano zonta il resto che il Cristianissimo re manda di Milan e le zente ordinate dia aver, e poi non seguendo etc. strenzerano la terra.

Fu posto, per li Consieri, Cai di XL e Savi, suspender i debiti a la Signoria nostra di sier Bernardino Zustignan qu. sier Marco, per anni do: 14 di no, 144 de si.

Fu posto, per li diti, suspender i debiti *ut supra* di sier Bernardo Pixani, qu. sier Francesco dal banco e fu presa. 19 de no, 134 de si.

Fu posto, per li Savi, che tutta la compagnia havia al signor capitano zeneral morto, sia tenuta in quel grado et esser come si dito capitano fusse vivo, e cussi la provision dava a li so' zentilhomeni, e questo per anno uno proximo, *ut in parte*. Fu presa 11 de no, 154 de si.

Fu posto, per li Savi, absenti sier Alvise di Prioli e sier Bartolamio da Mosto savi a terra ferma, che la mojer e fiol e fiole dil qu. signor Bartolomio d'Al-